



《佛說戒香經》

No. 117 [[Nos. 99\(1073\)](#), [100\(12\)](#), [116,125\(23.5\)](#)]

《佛說戒香經》

西天·譯經三藏朝散大夫試光祿卿明教大師臣法賢奉 詔譯

如是我聞：

一時，佛在舍衛國祇樹給孤獨園，與大比丘眾俱。

爾時，尊者阿難來詣佛所；到已，頭面禮足，合掌恭敬而白佛言：

「世尊！我有少疑，欲當啟問，唯願世尊為我解說。」

我見世間有三種香，所謂根香、花香、子香。

此三種香遍一切處，有風而聞，無風亦聞。其香云何？」

爾時，世尊告尊者阿難：

「勿作是言，謂此三種之香遍一切處，有風而聞，無風亦聞；此三種香，有風、無風、遍一切處而非得聞。」

阿難！汝今欲聞普遍香者，應當聽聞，為汝宣說。」

阿難白佛言：

「世尊，我今樂聞，唯願宣說。」

佛告阿難：

「有風、無風香遍十方者，

世間若有近事男、近事女，持佛淨戒，行諸善法，

謂不殺、不盜、不婬、不妄、及不飲酒。

是近事男、近事女如是戒香遍聞十方，而彼十方咸皆稱讚，而作是言：

『於某城中，有如是近事男、女，持佛淨戒，行諸善法，

謂不殺、不盜、不婬、不妄及不飲酒等。』

具此戒法，是人獲如是之香，有風無風遍聞十方，咸皆稱讚而得愛敬。」

爾時，世尊而說頌曰：

- | | | | |
|-----------|----------|----------|----------|
| ·世間所有諸花果， | 乃至沈檀龍麝香， | 如是等香非遍聞， | 唯聞戒香遍一切。 |
| ·旃檀薑金與蘇合， | 優鉢羅并摩隸花， | 如是諸妙花香中， | 唯有戒香而最上。 |
| ·所有世間沈檀等， | 其香微少非遍聞， | 若人持佛淨戒香， | 諸天普聞皆愛敬。 |
| 如是具足清淨戒， | 乃至常行諸善法， | 是人能解世間縛， | 所有諸魔常遠離。 |

爾時，尊者阿難及比丘眾聞佛語已，歡喜信受，禮佛而退。

《佛說戒香經》